

VELDEKE *J bekèt*

1e kwartaal 2020

Wëntjersnieë

VELDEKE bekèt,
Jaorgank 12, nummer 1

Krakelinge en Vuurstein...



Inhoud:

Waat gewaes is:

- Limburgs preuve
- Sterre Straole - 5
- Echter Krakelinge en Vuurstein
- Gedichte äöver de Nuusjtadt

Waat nog kömtj:

- Dialekmès Kerst
- Aester aovendje
- Flitscursus spelling
- Daag van de Modertaal
- Jaorvergadering
- Twieëdje Echter Dictee

Volgendj nummer:

Kömtj oet in mieërt
Stökskes töt 15 februari
te sture nao:
Veldeke Krink Ech,
p/a Oleanderstraat 2,
6101 BX Ech, of:
tvanwegberg@ziggo.nl

Web-site:

Kiek op www.veldeke.net
väör Limburgs nuuts,
op www.veldekekrinkech.nl
väör alles van de Krink.

Op Facebook:

Veldeke Krink Ech

Nuuts en Activiteite van Veldeke Krink Ech





Bèste Veldeke minse,

't Jaor 2019 hōbbe w'r bienao achter de rōk. Good door gekōmme? 't Bestuur van de Krink vuntj van de eine kantj waal. W'r hawwe 'n geweldig programma en äöver 't algemeen 'n gooj opkōmst. Van d'n angere kantj voor 't – persuuenlik gezeen – neet zo'n good jaor. Versjillendje leje zeen ós óntvalle en daonaeve voor 't hie en dao ouch kwakkele mit de gezóndjheid. Det wille w'r eigelik neet hōbbe. 't Weurtj tied det w'r mit volle krach de sjouwers ónger 'n nuuj jaor kōnne gaon zette. Daovöör hōbbe w'r óm te beginne weer 'n sjoan programma samegesteldj. Det vèntj g'r oppe achterkantj van dit blaad. Verder zeen w'r weer blie mit de steun van oos sponsors/adverteerders, wodoor de koste van oos Veld(j)ede Bekèt grootendeils gedèktj zeen.

't Leje-aantal is – wie gemeldj – get gedaaldj. Hawwe w'r in 2017 nog de 250 leje gehaaldj, noe zitte w'r dao alweer ruum ónger. Dao kènne w'r same get aan doon: Minse mit vraoge nao Veldeke en oetdrage wo w'r vöör staon. En det 't bezeuke van de activiteite de meutje waerd is.

Mit det good vöörnumme wèns ich uch, en ederein dae uch leef is, names 't bestuur alle goods in 2020!

Tót de Krink Ech behuere:

Aw Kirk, d'n Aosterberg, Baakhaove, Berkelieër, Brach, de Boesj, de Baek, Deetere, de Deelgaard, Ech, Echterbos, Gebrook, G'n Oea, 't Hènge, de Hei, Illikaove, Sint Joas, de Laak, Mariaveldj, de Nuujstadt, Ophaove, Pej, Pötbrook, Roostere, Sjaelberg, de Slek, Spaanshuuske, Staeveswaert, Vèsserswaert, Zöstere en alles waat dao ómhaer liktj.

Kerst in d'n oorlog...

Inleiding:

De familie Gisbertz wo óngerstaondj kersverhaol äöver geitj, woor 'n schippersfamilie . Wie de oorlog oetbrook op 10 mei 1940 loge zie mit hun motorsjEEP “de Concordia” in de Zuid Willemsvaart bie Beek en Donk. Waeges de bómbardemente móste ze zoa gaw es kós vertrèkke. Op de brögke wo ze óngerdoor móste, wore sprèngladinge aangebrach door de Nederlandse militaire. D'r mós dus hieël verzichtig gevare waere, want bie de minste aanraking zoewe die óntplóffe. Alle óntberinge van de oorlog hōbbe ze in de volgendje vief jaore, wonendj op hun sjeep, mitgemaaktj.

Zoa kome ze oeteindelik in Maasbrach en augustus 1944 in Ech terech. Es evacués zeen ze in november 1944 vanoet Ech te voet nao opa en oma in Reuver gegange en dao terech gekōmme in de febriek van gresware. Vanoet Reuver zeen ze, op bevel van de Duitsers, in februari 1945 nog mótte evacueere nao Kaldekirchen en oeteindelik in Bracht bevriedj op 1 mieërt 1945. Nao de bevrieëng trök gekōmme in Ech zeen ze oeteindelik op de Haoveldjswaeg kōmme wone.

't Verhaol geuf weer wie óndanks det alles de Kersdaag waerdje doorgebracht.



Noats vergaet ich mieë dae Kersmörge in de febriek bie de Paters. De aove-ruumdje woor sjoan aangeklèdj: ze hawwe de bèdder opgestapeldj taeye de moere. Hie-op kóste de minse zitte, weer ouch. De moere hawwe ze bespanne mit witte lakes, dao-op dennegreun en mit road pepier verseerdj. 't Woor zoa vol sfeer en det maakdje dich blie; 't leek ech Kersmis, óndanks de afsjuwelike oorlog wo w'r midde in zote. W'r zeen allemaol nao de H.Mès gegange, ouch Truuske en Bennie. De Paters zóngje sjoan en d'r waerdje gebaedj det d'r toch gaw vrede zoe moge zeen. Aan 't ènj waerdje nog 't “Stille nach” gezóngje door groot en klein, zoa sjoan.

't Woor es of w'r trök op 't sjeep wore. Want mit Kersmörge loesterdje w'r altied nao de radio. Ich vónj det es kèndj al zoa sjoan. Mer noe hie allemaol same zènge: de paters, de vaders en moders, de kènjer groot en klein en de óngerdukers. Dit was get óm noats te vergaete. 't Is mich den ouch mien ganse leave biegebleve. Zoa ouch bie Pap en Mam, Coen, Albert, Gonnien en mesjien ouch Harrie. W't hōbbe d'r later nog dök äöver gespraoke. Jao, ouch Pap woor d'rbie, same mit de anger óngerdukers, die aeve oet hun sjoelplaats gekōmme wore óm same Kersmis te vere.

Ónger de deens hawwe de paters extra good opgelèts of d'r Duitsers in de febriek zoewe kōmme. Gelökkig is det good gegange. W'r zeen de ganse H.Mès bie-ein gewaesj, det woor al 'n fieës: Pap mit Truuske en Bennie bie zich, op edere knie zoot d'r eine, wie det vreuger ouch woor, en nao de kersviering aeve mit ós mit nao de aove gegange óm mit ós te aete. Geine balkebie of anger lekker dènger, mer druueg broad det w'r op 'n kechelke kóste ruuestere; eder 'n sneetje, mieë woor d'r neet. En d'r woor thieë, van 'n tebletje, zóngje sókker.

Later koom 'ne pater nog mit 'n half gesneje broad in 'n mendje. Hae vertèldje det ze det p'r óngelök te vööl hawwe aafgesneje. "Kunt u dat misschien gebrui-ken?" vroeg hae aan mam. Natuurlik hawwe die det neet te vööl aafgesneje, want ze hawwe zelf mer net genóg óm in leave te bleve. Ze hawwe det bewusj oetgespraardj op hun eige rantsoen.

Det deje ze versjillendje kieëre es ze merkdje det weer geine wèk mieë hawwe. Ze lete noats merke det weer niks mieé hawwe, altied woor d'r zoagenaamdj te vööl aafgesneje. De meiste families in de aove, wore van boere-aafkóms of ze hawwe familie die nog get mael haw 'vöör broad te bakke. Det woor bie ós natuurlik neet zoa. De aojers van Pap en 't gezin van Tant Mina en Ome Ben kregenog waal 'ns get bie de boere en aa fen toe woor d'r den ouch nog get vöör ós bie. Mer zie hawwe ouch nog evacuees oet Vènló in hoes en die móste ouch aete.

Weer zólle verder die Kersdaag net wie de anger daag in de aove doorgebracht höbbe. Pap woor weer weg nao de sjoelplaats en weer lepe get door de febriek. De meiste tied zote w'r bie Mam rón dj 't kechelke, det toch nog get wörmdje en gezelligheid oetstraoldje, noe d'r geine kersboom of kaeskes wore, wie w'r det op oos sjeep altied gewèndj wore gewaesj.

Annie Gisbertz,
Dialect: Ton van Wegberg

WAAT AL GEWAES IS

Limburgse preuverie

In streekproducte zeen dus ouch versjille. Zoa kregen w'r te huere van Judith en Peter Janssen op de thema-aovendj äöver det óngerwerp. Vöör de typisch Limburgse, wie vlaai, zoervleis, nonnevotte, sjoap, kriege en verdene vööl aandach. Soms ouch besjerming, want ze waere gaer naogemaaktj. Dees producte kómme van vreuger haer oet 'n bepaaldje streek, in dit geval dus Limburg e.o.. De vöör de productie noadzakelike grane, vruchte enz. kómme oet de streek, zeen dao verboewdj, geougsj en toegepasj. Limburgse kesevlaai zoe dus gebakke mótte zeen door 'ne Limburgse werme bekker, van graan oet dees streek en belag mit kese oet 'ne bóngerd van hie oet de ómgaeving. Erkèning van dees producte es streekproduct weurtj naogestreefdj, mer det is 'ne lange en vöör klein bedrieve soms te dure waeg.

Daonaeve höbs se de streekproducte, die waal hie gemaaktj waere, mer wovan de óngerdeile neet altied of gans oet de eige streek kómme. Bevöörbeeldj appelsap, gemaaktj van boetelandse (soms goodkouper) appele, die vlaai van de fabriek wovan de kese oet 'n anger landj kómme. Kan toch lekker zeen, mer gein ech Limburgs streekproduct: den mótte de appele vöör det applesap ouch hie van de buim kómme! En es lèste categorie zeen d'r de z. g. "trends": producte mit op de ein of anger meneer 'n relatie mit de streek. Wie babbelieërs die op 'ne kezel lieke en wo den op 't tuutje stuitj: "Maaskezele". 'tZelfdje tuutje kan in 'n anger provincie de naam van de IJssel drage... En zoa zeen d'r nog mieë.

't Woor 'ne interessante en verhelderendje aovendj op 20 september. Plezerig ingevöldj mit de versjillendje streekname vöör sommige producte en streekgebónje variaties in recepte. Tössedoor veel – wie vööraaf aangekondigdj - ouch nog ein en anger te preuve. De ruim 70 leje die deze aovendj bezóchtj höbbe, zólle dao geine spiet van höbbe gehadj.

Mösjesjpel in de wèntjer

Vreiswaer hink in de lóch
de buim zeen naat en kaal
witte riep op 't graas
Keuning Wèntjer maak zich klaor
jus wie veurig jaor.

De mösje sjele tösje de tek
hun sjpel, 't mösjesjpel
mit wèk in de bek
vleige ze flot en gek
van de gróndj nao de tek.

Ich kiek d'rnao
röstig en tevree.

Eine minsj houf neit mee.

Phil Schaeken,
Zitterd



Sterre en Kampioene

120 Steul wore klaor gezatj in de Hermeniezaal. Det wore d'r al get mieë es bie de vöörige aovendj "S(j)terre S(j)traole" in 2017. Mer d'r móste nog steul bie gezatj waere! De belangstelling is van kieër tót kieër gegreudj, vanaaf det weer – Veldeke en de Natuurvrunj - in 2011 mit dees activiteit zeen begósj. Blikbaar spruktj 't aan.

Ouch deze kieër weer 'n gevarieerdje selectie van lokaal artieste: gevarieerdj in laeftied, in programma, in ervaring, in aafkómst (kerne van Ech-Zöstere). En det alles in 'n sjoan aafwisseling van sjpas en mitzènge, mit rösmomente wo-in de zaal moesstil woor en loesterdje. Det alles good geprissenteerdj door Jos Douven.

De aovendj begós mit 'n kort welkómstwaord door John van Bree, de vöörzitter van de Natuurvrienden Zöstere. Daonao kós de prissentator geliek 't (kirkelik) dameskoar oet Deetere aankondige, die 'n selectie van Limburgse leedjes brachte. Hienao 't jónk talent Sandy Reijners mit 2 nummers op hobo. Kaor en hoboïste aan de piano begeleid door Ad Gijzels. Van de declamatiewedstried van dit jaor droog Vinnie Huisman 't gedich "50 euro" vöör womit hae de ieëste plaats haw behaoldj. De lachers op zien handj, wie m'n de inhawd van zien gedich door haw. Daonao koom Linda Koolen op de bune, mit limburgstalige leedjes wie w'r ze neet zoa dök huure. 'n Geweldige stöm, mit sjoan begeleiding door Johan Derez op gitaar. In december kömtj 'n CD oet, die óngetwiefeldj zal aanslaon. Lache kós m'n vervolges ouch mit de spontaan vöördrach van zien gedich "ne wèndj" door Mirthe Pustjens: Kampioen van Limburg dit jaor in de klasse 3-4!



De pauze waerdje ingelèdj door Sef Laugs van de Boesj, ónlangs oetgerope tót bèste vastelaovesartiest van de lèste jaore. In tied van niks haw hae ederein aan 't mitzweyje of mitzènge. De pauze woor 'n rösmomènt.

Nao de pauze paktje de groep Averegs de draod weer op. Mit get minder bekèndje leedjes deze kieër. Mer ze moogdje toch neet van de bune zónger "'t Greun van 't graas" gezóngte te hóbbe. De groep treutj neet mieë zoa vööl op, mer es se d'r zeen, staon ze d'r. Aansloetendj koom 'n sketch door Annie Schreuders-Derks äöver zelfverdediging. De minse in de zaal hóngte aan häör luppe en kome aaf en toe neet bie van de beeldendje demonstraties van waat zie allemaol al gelieërdj haw. Mieke en Erik Bastiaans (gitaar),

't Lidmaatsjap

löptj door...

Dit jaor blif de contributie vöör Veldeke 'tzelfdje es vöörig jaor. Die biedrage van leje is es volgtj samegestèldj:

-Veldeke Limburg: eur biedrage óm de Limburgse taal en cultuur te behaoje: 20 euro per lidmaatsjap/adres.

-Dao kömptj vöör de eige activiteite van de Krink Ech, 10 euro per persoan boave op. Totaal betaaltj g'r dus:

Ènkel lid: 20 + 10= 30 euro;

Koppel: 20 + 2x10= 40 euro.

Leje die 'n machtiging hóbbe gegaeve, kriege dit aafgesjreve in 't ieëste kwartaal van 2020. Waem gein machtiging haef gegaeve, krig 'n betaalverzeuk, ouch in de loup van 't ieëste kwartaal. G'r betaaltj 't ganse bedraag aan Veldeke Limburg; die verraekene det den mit de kringe.

Weer haope natuurliek det g'r ouch in 2020 allemaol lid blifftj. Mer es g'r det óm ein of anger raeje neet mieë zótj wille, vraoge w'r óm vöör 1 jan. op te zegke. Anges blifftj g'r lid en weurtj ouch verwachtj det g'r betaaltj. De leje-administratie löptj via de penningmeister; adres oppe achterkantj.

same mit Bart Pustjens (trompet) wore d'r vää'r 't volgendje kerteer: sjoan limburgstalige leedjes óm stil nao te loestere en bie nao te dènke. Weer zo'n rösmoment oppe aovendj, wobie de zaal moesstil loesterdje. Wonao de Rivella Boys weer vää'r de aafwising zörgdje mit hun kolderiek optraeje en zang. En esof de minse in de zaal nog neet meug wore, hienao waerdje nog volop mitgezóngje mit Ad Gijzels op zijene trèkzak. 't Woor al laat wie de vää'rzitter van Veldeke, Ton van Wegberg de aovendj ging besloete mit dank ouch aan al degene die boete de optraejes aan deze aovendj hun biedrage hawwe geleverdj. En aan 't publiek natuurliek, want zónger publiek geine sjoane aovendj! Tót 'ne volgendje kieër?



Trèkzak

Bie leefs drie optraejes bie Sterre Straole waerdje 'ne accordeon ingezetj. In dialek is de naam van dit instrument: trèkzak. Neet vraemdj es m'n kiktj wie dae bespeeldj weurtj. Meis kènne w'r de trèkzak van de zg. volkstümliche meziek oet de Alpenlenj. 't Brunk stömning, mer neet ederein hèltj d'rvan.

Hieël good lieëntj zich dit instrument aevel ouch óm oppe achtergróndj bie hedendaagse meziek 'ne bepaoldje sfeer op te rope. Zoa gebroekdje o.a. Averegs en de groep Rivella Boys de trèkzak bie hun optraeje. Weer anges woor dit op 't enj van de aovend, wie Ad Gijzels 'n aantal aoj bekèndje leedjes speeldje, die ederein mit kós zènge. En det waerdje volop gedaon!



Krakeling en Vuurstein

Vää'l werk woor verzatj óm de Veldeke-aovendj äöver dees Echter lekkenieje op 'n gooj meneer te kènne prissentere. Mer det haet zich geloandj! Allein al door 'n gooj opkóms van belangstèllendje leje en neet-leje. Det geuf aan det d'r nog interesse is vää'r de Echter Krakeling en Echter Vuurstein. Ouch de inhawd van de aovendj woor zeker de meutje waard, mer 't leep neet allemaol vanzelf. De techniek wèrkdje neet mit.

Annie Schreuders-Derks beet de spits aaf mit häör verhaol mit beeldje äöver waat de minse ruum 'ne ieëw geleje es lekkenieje zoge, door gans 't jaor haer. Gebak wie knapkook woor aevel "gewuuen" aete, niks apaarts. Det haet zich dus óntwikkeldj. De meneer wo-op Annie ein en anger vertèltj, maaktj detse d'r aan geis twiefele... Woor det ech zoa? Mer Annie is geine grepkesmaker; zien verhaole zeen volkshistorisch waor en mesjien mótte w'r dao noe óm lache. Lache mit ószelf dus.

De sjermpresentation äöver de Echter Krakeling sloot hie op aan. De bekker Joosten verstóng de kunst óm die gewuuen krakeling zoavää'l mit te gaeve, det 't get bezunjers waerdje: de Echter Krakeling woor gebaore. En mit vää'r dae tied kundige prissentatie waerdje 't 'n vää'l gevraagdje en äöver de waereld verstuurdje delicatessse. De opvallendje blikke en talriek behaoldje priesse op



tentoanstellinge maakdje de krakeling oet Ech zoa geleefdj. Jaomer det ze oeteindelik officieel neet mieë bestaon. De informatie oet de bekkerie van Joosten en de groate sjilderieje mit gouje medaaljes, mitgebracht en toegelichtj door Mariet Witkiewicz-Tijssen, nich van Fien Joosten, maakdje de prissentatie van dit óngerwerp compleet.

De verhaole rón dj de Echter Krakeling kome ouch trök bie de beeldje van de volleybalploog mit dae naam oet de tachtiger jaore, bie de dördje Echter Revue oet 1999 en de prieze van 't Echter Dictee vanaaf 2019. In die variaties bliektj de Echter Krakeling dus nog neet verdwene! Wo 't filmke oet die Revue mer neet op gang wól kómme, zörgdje nao de pauze (mit knapkook bie de kóffie!) 'n vieftal leje van 't Revuekoar vöör 'n gepasjde muzikaal invölling mit 'n aantal leedjes oet de revue. Daonao ging 't äöver de Echter Vuurstein. Daovan is nog minder bekèndj. Allein det bekker Omloo van de Bävvestestraot ze 'n paar kieër p'r jaor in zien assortiment haw. Veldeke-lid Len Houben vertèldje wie hae hiedoor geïnspireerdj waerdje óm die vuurstein te gaon make. Nao get oetzeuke en oetperbere is h'm det gelöktj. Ouch hie wól 't filmke neet op gang kómme. Det doon w'r noe mer bie 'n anger gelaegenheid. 't Recept stuitj ouch in oos Kaokbook "Thoesrecepte" op blz. 34. Mit dit alles waerdje 't 'ne good geslaagdje aovendj, dae de vöörzitter mit dank aan ederein dae mitgewèrkjt haw kós aafslote.



De Nuusjtadt in gedichte...

Op 21 augustus j.l. woor de poëziewanjeling in de Nuusjtadt. In de vöörige oetgave van Veldeke Bekèt is dao al aandacht aan gesjónke. 'n Paar van de vöör dees wanjeling speciaal gesjreve gedichte zeen toen al geplaatst, mer d'r woor te weinig plek óm ze allemaol op te numme. Toch kömtj edere kieër van de deilnummers 't verzeuk de gedichte nog èns te kènne naolaeze. Daoróm plaatse w'r – net wie vöörig jaor – noe de anger gedichte, mit foto's d'r bie.

't Bestuur bekiktj op dit moment de möögelijkheid óm van alle vief de poëziewanjeling 'n foto-beukske oet te gaeve. Dao-in zólle den van eder wanjeling 'n aantal gedichte opgenómme waere, same mit foto's van de betreffendje locaties op Lilbosch, in Zöstere, Staeveswaert, Ech en de Nuusjtadt. Zo'n oetgave zal vöör de wanjelieërs, mer ouch vöör anger minse oet dees ómgaeving 'n sjoan, herkènbaar book zeen. G'r huuertj d'r nog van!

Walle en paorte

De Nuusjtadt van vreuger
is op vandaag nog te zeen
wie 't stedje gelaege woor
en waat later verdween...

Walle van aerd
ómslote
en besjermdje
hoezer, 't vieë
en de luuj
waat daovan is gebleve
zuutj m'n nog huuj

Alle gespoes
bleef boete de paorte
't awd Elsene
haw d'r leefs drie
waem 't stedje in wól of d'r oet
waerdje in 't oug gehaoje
destieds 'n verstenjig besloet

Kiek hie noe dae bóngerd
de lieëgdje midde-in
te herkènne
es restant van 'n grach
volstorte is gaw gedaon
es 't zoe mótte
mer zoa blif 't verleje bestaon

*Ton van Wegberg,
Echs, 2019*

Senterfuuj (1897-1922)

Waal zilver mer gei goud

Ich wis ech neet wo oppe Nuujstjadt de mèlkfebriek woor. Want nieks in dees gemutelike buurt duitj nag trökkinde anen tied det hie 's morgens en 's avoes nao mèlkestied e leger mit paerd en ker oet alle windjstreke mèlk in blinkende tuite aan kwome gevare. Mer waat doertj ieëwig? Want wo blief de identiteit vanne Nuujstjadt? Ich loos det 't Raodhoes verkoch is, sjoedale ingekrómpe, Groene Kruis en vereininge oppe klater. 'Alles kump good,' zègke ze, mer waal dök minder en later.

Want van det goodkómme is hie inne Haverterstraot klam get te mèrke. Hie en dao zeen, half oppe stoep, parkeerstrepe gekalk. Auto's hóbbe hie veurrang op rollators, die zich dök vasloupe. Zandjboere, inne sjeem vanne stad wied aafgelaege, zuus ze bekans neet mieë. Die laefdje en poejakdje doe op erme grondj. Kinnes en geldj woor d'r neet op det sjraole landj tösse Zitterd, Zöstere, Roostere enne Zelfkantj. Boere wore braaf en bleve erm.

Mer in 1891 versjeen de encyclick Rerum Novarum (de 'omwenteling'), daonao al gaw de LLTB en nao get gekuum en gezuch kwoom de boerebondj in eder gehuch.

Ouch onieke mèlkfebriek, bóterfebriek, vieëverzekeringe, zaodhanjel en euveral godzijdank de Boerelieënbank. Boere zoge inëns in óm same te wirke, en ginge energiek, allemaol kattelik, nao de febriek waal mit vädol geklaag euvere encyclick.

Ouch hiej oppe Nuujstjadt kwoom 'n mèlkfebriek mit keultechneek, machiniste en sentrifugiste. Handjkrach waerdje moterkrach, daobiej stoum, det woor häöre droum. Vädol ónres, op- en neer geloup, sjörkerre, hóndjkerre en boerekerre. Blitseblank gesjoerdje mèlktuite kloetsendj vol toet ane randj. Allemaol nao de fuuj wo ze aan d'r daag, krek soldaote, in 'n riej veure pórt waerdje achtergelaote.

Boete huurdje se 't vrouljegebebbel en gegiechel van maedjes, binne snordje de mesjinerieje, en zónge de jónges en manne óm te óntspanne... Vädol dörper en dörpkas in 't landj van Swentibold kreges rón dj 1900, waat sjiek, 'n eige bóterfebriek. Det verbaeterdje de laeveskwaliteit enne produktie. Daomit blie, woor de senterfuuj inëns krek e verlingstök gewore vanne boerderie.

Mer ane veuroetgank woor gein óntkómme mieë aan. De mèlkfebriek Helséne waerdje inne loup vanne jaore St. Rosa, St. Rosa Sibema en Sibema Campina. Ze zagte de mèlkfebriek oppe Nuujstjadt haw g'n riool, 't water oete waterpót miserabel, de vloere neet waterdich en 't raengendje door. Mit alle gooj bedoelinge alles bie-ein 'n zoj. Mer waas, mitte opvattinge van daen tied, alles waal zo goor? Veer wete noe in eder geval wo oppe Nuustadt de mèlkfebriek woor.

Karel Ruiten
2019



Wie 't geit...

De zwartmarmere aafdèkplaat röstj ónger 'n gerdien van gael staof en verweidje verslakterdje blome. Op de oetrein getraoje kezel ligktj 'ne sjótelsplak, 'ne zeem, 'n raekske en 'ne poes junkerkes. Zónger bezej weurtj de ummer knatsjvol geklaterdj.

"Bös se al lang hie? Haw dich neet eder gezeen. Geit 't e bietje?"

Verwaeze kiktj zie op. Haet 't waal gehuuerdj mer is in gedachte wuud eweg.

"Wie lang is 't noe al geleje? Dao wore nag-al get luuj in de kirk, neet? Ich zoog dien drie kënjer naeve dich. Die hawwe 't toch zwaor! Wievädol klein-kënjer d'r wore hób ich neet kënne zeen. Wie lang woortj g'r getrouwdj?" Dao kömptj gein antjwaord. Toch geit die klaanjer wujer.

"Pestoar praekdje sjoan, mer waal get lank, vónjs se neet? Jaomer det de köster en 't dameskoar gein toan kóste haoje en aventoe d'r naeve zónge. Hae haw ein net prèntje, dao stóng d'r jónk op."

Gans verpópzaktj wiltj ze wujer en zaet: "Gaon noe mer effe zien graaf zuver make en nuuj blome in de vaas zitte."

"Vunjs se zónne stein ouch neet sjandalig duur? De gekapdje lètters zeen al bekans neet mieë te laeze. Ze zoewe van goud zeen hóbbe ze mich toendertied gezag, mer det is gelaoge, richtige aafzètterie. Alles kostj toch al mieë es zat!"

Zónger nag get te zègke, löptj de widvrouw weg. Óngerhandj begintj 't orakel óngesjeneerdj opnuuj.

"Höbs se die blome gezeen op 't graaf van die van Kentjes? Nou die loupe ech de kentjes d'r vanaaf. 'ne Zelf geplochdje poes in 'n bóterkuupke, dae al waeke ómgewejdj en oetgedruuegdj naeve de stein ligktj. Sjanj, zoa nej es get!"

De ummer weurtj neergezatj.

"Doe vreugs toch wie 't mit mich geit? Wie zal ich dich det zègke. Doe wets eigelik bès waal wie det veultj, mer... vènj mer èns de richtige wäörd."

Ech, juli 2019
Mia van Wegberg-Kurvers

D'n haof

't raegentj blaore op 't water
 es hae nao boete stuuftj
 klump klaatse äöver keie
 bloate kneen, gestrikdje zök
 de patsj sjeif op 'n oar
 zien bóks hungtj
 wie 'n fóddel óm zien kóntj
 rap rentj hae de straot oet
 en door 't getske
 op waeg
 nao häöre eige poszegel gróndj

mam haw 'm drop oet gesjik
 om boerekuuel te haole
 hel-op knoterendje hae in zien eige
 woróm woor hae ummer de hannes
 mós hae alzelaeve opdrave
 hae kós 't mer neet snappe
 zien zósters zote werm
 naeve de stoof
 get sumpel bókse te lappe

henjig sneej d'r twieë hótjes aaf
 en keek nog flot
 wie de res d'r bie stóng
 zeiknaat aeve later inne kääke
 zag de mam; doe bös de bèste, jóng

Allewel kèns se dich dien greunte
 online bestèlle
 verantwoordj biologisch,
 kantj en klaor
 gewasse slaaj
 in godweitwieväöl saorte
 gesneje soppegreun,
 gesjrapdje moere
 fair-trade banane in 'ne tros.
 kènjer die neet mieë weite
 wie 'n aerpel of 'n moer greutj
 ich gaef ze neet gaer de kos

hie in dees oase van rös
 is de tied wie bevaore
 nog ummer gaon luuj door 't getske
 óm get inne haof te maore
 mer det lepke gróndj is noe hobby
 men hooftj d'r gein tejjers mit te vólle
 'broadnuuedig' is neet mieë
 van deze tied
 men kèntj op zien gemaak
 get fispernölle

en is de ougs verzaope,
 versjangeleerdj door gevruuer
 of hób se gewuuen gaar gein gedöldj
 den rap nao de haof van Appie,
 Jantje L of de Plus
 en diene keulkas
 is weer greun gevöldj

Miranda Meuwissen-Vergoossen
 't Hènge 2019



De Kirk van de Nuusjtadt

Jederein haet natuurlijk al opgemirk
 veer sjtaon hie noe, bie de kirk
 Ein van de awdste geboewe van de Gemeinte Echt
 en dao mouge v'r greutsj op zeen, terecht
 Joannes Baptista oftewaal St. Jan
 is de patroonheilige hie van
 Vruiger woort, zo wie m'n nog altied zaet
 dèkser bie St. Jan gebaed
 meistens es me koppien haw
 of hae den kós helpe, en leifs heel gaw
 De kirmes die is ouch aan häöm gewied
 vruiger sjtóng die bekènd, wied en zied
 Mer noe nog euver dit prachtige geboew
 veer zeen greutsj dao op, en hoe
 Deez kirk sjtamt oet 1300 ongeveer
 woord gerestauraerd, diverse keer
 Architect Cuijpers maakte in 1862 't begin
 van 'nne nuuje ingangk en de sacristie
 Meer dao bleef 't ech neit bie
 want architect Wielders, 'nne echte jóng van de Nuusjtadt,
 koum zo tössje 1927 en 1933
 mit 'nne nuuje tore en ein nuut portaol
 det woor dus effe ein anger verhaol
 Doordet die twee architecte hie aan hóbbe gewirk
 krege veer waal ein kirk
 die bezunjer is in sjtiel en boew
 ouch gans nog oet mirgel boewde me ze doe
 De sjtiel van ós kirk is ouch waal apart, moug waere gezag
 Beide architecten hóbbe, jeder veur zich,
 dao euver naogedach
 Want d'r zitte twee boesjtiele in
 De Romaanse sjtiel van Cuyper, det woor 't begin
 en bie de restauratie brach Wielders de Gotiek
 Ein combinatie van beide sjtiele, zèk mer, geweun uniek
 Nao de tweede wereldoorlog woor d'r vööl kapot
 mer ze is toen waer opgeboewd
 in den awwe sjtiel, eigelijk bès waal vlot
 Ich zou hie nog vööl meer euver kènne en wille zègke
 mer det wurdt te vööl óm oet te lègke
 Ein dènk is zeker, ós kirk is gewoon
 awd, mer versjrikkelijk sjoon
 Vööl d'r aan verangere det moug ech neit
 omdet ze noe ónger monumentenzorg sjteit

Nuusjtadt, augustus 2019
 Ria Martens-Verkuijlen

WAAT NOG KÓMME GEIT

Dialekmès mit Kersmis

Dit jaor zeen w'r aafgestaptj van de combinatie dialekmès en kersviering. Väär de kersviering is de adventsmiddig in de plaats gekómme, dae w'r op 15 dec. al höbbe gehadj. De dialekmès in de kèrk van Pej mit mitwèrking van pestoar Mom en intenties vээр alle leje en awd leje van oos vereniging wille w'r echter instandj haoje.

Teminste es geer kómtj **op vriedig, 20 december, óm 19.00 oer**. De mès is bestómdj vээр ederein. Nao aafloop beje w'r uch 'n lekker tas kóffie aan en de gelaegenheid óm effe nao te kalle. Det doon w'r in de café van de Pejjerhaof.

Flitscursus en Echter dictee

Spraeke kènne w'r oos modertaal allemaol.
Mer...weer kriege dök de vraag: Wie sjrifs se det noe eigelik?
Daoróm haoje w'r, net es 't vээрig jaor, ouch dit jaor

'ne Flitscursus,

dae geit äöver 't good sjriev van oos modertaal,
mit name oos Echter taal.

Geine cursus van 6 aovendje van 2 oer,
mer alles op eine aovendj van twee en 'n half oer.

Dus: de cursusleider Piet Aobe geit mit uch flitsendj door de ganse stóf haer.

Waem köms se taege op zó'ne aovendj?
Luuj, die vээр de 1e kieër kènnis wille make mit de spelling, de sjrief-
wieze van oos limburgs en...
Luuj, die de cursus al èns gevolgdj höbbe en ein en anger nog èns wille
opfrisse, en...
Luuj, die mit wille doon aan 't Echter dictee en zègke: "Ich wil dao 'n
goj bäärt make!"
Haopelik zeen d'r vээр, die daonao gaon mitdoon aan 't

2e Echter dictee.

Weer kónne gerösj zègke: "Wegens succes geprolongeed!"
't Vээрig jaor: in de 20 deilnummers; vээр publiek,
die de kat èns oet de boum kome kieke;
ne hieël óntspanne en gezellige sfeer en...
'n trotse wènneres van de trofee: de Echter krakeling:
Annette van Kempen, vanne Laak.
Raeje genóg óm 't nog èns äöver te doon.
De vээрberijinge zeen al in volle gang.
Wuntj Annette vээр de 2e kieër of geit emes anges mit de Krakeling
nao hoes.
't Dictee krig, net es 't vээрig jaor, 'n thema. Welk?
Gaeftj uch op en doontj mit, den kómpjtj g'r dao vanzelf achter.
Mesjien det geer nao aafloop ouch kèntj zègke:
"Ao jao, zoa sjrifs se det in oos modertaal."

De Flitscursus: vriedig 17 jan. van zeve oer tót half tieën
in de Fanfarezaal "Lei van Naer" in Pej.

't 2e Echter dictee: zóndig 15 mieërt vanaaf 3 oer
in C.C. "Dr. Edith Stein" in Ech.

Daag van de Modertaal

De internationale daag van de streek-
tale is op 21 februari en det vèltj in 2020
op de vriedig vээр vastelaovendj. Is det
óngunstig in zó'ne drökke tied? Of
doon w'r d'r gewuuen get mit in 't teike
van de vastelaovendj, want det is toch
'n bezunjer uting van 't gebroek van
oos modertaal.

Vriedig 21 fibberwari dus gemaaktj
tót 'ne daag van modertaal-activiteite.
Op de radiozender L1 zeen de ganse
daag, tösse de vastelaovesmeziek
door, vээрdrachte te huuere in de
versjillendje Limburgse dialekte. Det is
bezunjer vээр 'ne zender dae tót noe
toe neet zoaväär in 't Limburgs wól
doon. 't zaoterdesmiddigprogramma
"Plat-eweg" van Henk Hover haet vээр
'ne doorbraak gezörgdj en noe keusj
de zender vээр 'ne ganse daag Lim-
burgs! Ouch door sjrievs oet Ech en
Zóstere zeen tekste ingestuurdj, mer
welke oeteindelik oppe radio kómme
is nog neet bekèndj. Laotj uch dus mer
verrasse!

In 't kader van 'n estafette van activi-
teite van de versjillendje Veldeke Kring-
ge hèltj VKEt in 't Groat Kefee van 't
Kultuurhoes aan de Plats dae aovendj
'n spraekoer "Good Plat". Dao is eder-
ein hertelik welkóm, óm plat te kalle
natuurlik. Mesjien prinse of raodsleje
taege te kómme, nao meziek te loes-
tere enz. Mer zeker en bezunjer wel-
kóm zeen minse die nog mit tekste
worstele vээр hunne vastelaoveswage
of hun einzelgänger-act. Gaer wille w'r
die helpe es d'r probleme zeen mit "wie
sjrifs se det?" Want vastelaovesgrap-
pe kómme pas good äöver es ze door
de minse langs de kantj ouch gelaeze
kènne waere. En det begintj mit good
sjrievs dus! Veldeke Kring Ech wiltj
daobie helpe. Ouch es g'r eur ónger-
werp nog geheim wiltj haoje. W'r trèk-
ke ós den effe trök in 'n "geheim kae-
merke" in 't Kultuurhoes, wo den alle
vraoge gestèldj kènne waere en alle
alle hulp gebaoje. Maaktj d'r gebroek
van! **'t "Good Plat"-** spraekoer op 21
fibberwari dus, vanaaf 19.00 oer.

Laezing Klimaat en Biodiversiteit

'n Óngerwerp waat in de langstèlling stuitj en dit ouch verdeentj, is de klimaatverandering. Minselike ingrepe ligke aan de basis van dees veranderinge. De laezing door Ad Havermans bie oos zóstervereniging vöör natuurhistorie "Pe-pijnsland" zal de samenhangendje óngerwerpe behanjele. De klimaatverandering haet vanaaf 't aannumme van de Klimmaatwèt in juni 2018 'n vrie algemeen maatsjappelijke aandach gekrege. Mer daomit zeen w'r d'r nog neet. Genóg probleme wovöör nog 'n oplossing gevónje mótt waere.

Ónger biodiversiteit verstaon w'r 't instandjhaaje van versjillendje saorte. "t Oetsterve van dere, korale en plantje mótt verkómme waere en 't ein hungtj mit 't anger same. Waat zeen hie de oorzaak en wie kènne w'r dao aan doon? Dees óngewiefeldj interessante laezing is ouch vöör Veldeke leje gratis toegankelijk **op daensdig 21 januari óm 20.00 oer in CC Pius X aan de Mussenstraat 6 in Ech.**



Bóntje middig - Bóntje aovendj

Leje van Veldeke Krink Ech kriege dit jaor 2 kanse aangebaaje óm 'n vastelaovesactiviteit te bezeuke. De vastelaovendj is nog altied bie oetstek de plaats óm oos Limburgse plat te laote huuere. In toespraake, meziek, sketches, vöördrachte en bute.

Al hieël get jaore wore w'r es leje van Veldeke Krink Ech te gas bie de vastelaovesvereniging "de Aester" oet Ech. Ouch dit jaor zeentj g'r weer oetgenuedigd vöör de speciale seniore-aovendj op woensdig 22 januari.

Oze Krink haet det al die jaore in gooj samewèrking en mit plezeer bönne 't programma aangebaaje en w'r blieve det ouch doon. Dao zeen 'n aantal raeje vöör.

Op de ieëste plaats waardere weer es Veldeke es anger vereniginge get rónjdj dialek organisere en prestere. Dao zeen w'r den gaer bie. Daonaeve wete de troew bezoekers van deze aovendj waat ze kènne verwachte: 'ne geweldige aovendj mit 'n sjoan programma mit vööl artieste. Zoa zoewe weer noats 'ne eige carnavalsaovendj kónne organisere. Dit jaor mit artieste wie Andy en Roy, Frans Croonenberg, Ziesjoem, Spik en Span en de Toddezek. In de buut kómme Bas van Neer en Bjorn Smits.

Mer vastelaovendj is mieë en kan hieël versjillendj geprissenteedj waere. Es m'n zeuktj nao de oorspróng van de vastelaovendj es vórm van volkscultuur is zeker ouch de bóntje aovendj of -middig van de vastelaovesvereniging "de Aester S.U." oet Pej interessant en de meujte waerd óm te bezeuke. Gein artieste van boete, mer mit 'n invólling oet eige dörp. Mit 'n eige Prinsekepel en sketches op meis plaatselike of gemeintelike geböörtenisse. Dao haet Veldeke zeker ouch waardering vöör en óm det te óngestreepe beje w'r dit jaor 2 möögelikheje aan.

Ouch oppe vastelaovesmiddig van de Aester Sjaelen Uul zeentj g'r van herte welkom. En es g'r 't wiltj vergelieke of gewuuen de vastelaovendj stevig in wiltj zètte, kóntj g'r ouch nae allebei gaon!

Óm same van dees sjoan vastelaovesactiviteite te kènne genete, hoof g'r ouch allein mer oppertied (uterlik op 12 jan.) aangemeldj te höbbe. 'n Breefke mit aankondiging van allebei de activiteite en 't banknummer enz. vèntj g'r los in dit blaad. Met lètj estebleef op: Bie opgave aangeave: eur lidnummer en Ech of

Jaorvergadering VKE 2020

De jaorvergadering van Veldeke Krink Ech weurtj ouch dit jaor gehaoje in 't MFC "de Peijerhaof", Houtstraat 7 in Pej, op woensdig 4 mieërt 2020 óm 20.00 oer.

Op 4 mieërt zal de kóffie broen zeen en de vlaai klaor staon vöör oos jaorlikse statutaire vergadering. W'r kieke trök op 'n sjoan verenigingsjaor mit vööl drökbezóchte activiteite. De statutair verplichdje óngerdeile, zao wie 't jaorverslaag en 't financieel verslaag, zölle w'r vöör de pauze behanjele. Ómdet de verslage van de activiteite al bie uch bekèndj zeen via oos Veldeke Bekèt, hooftj det allemaol neet lang te doere.

De kascommissie zal verslaag oetbrènge van hun bevènjinge, wonao de beneuming van de nuuj kascontrolecommissie aan de beurt is. De traditie óm de contributie neet te verhuuege zölle w'r dit jaor ouch in ieëre haoje.

Den gaon w'r verder mit 't aaftraeje en beneume van de bestuursleje. Dit jaor zeen Anke Heythuysen en Ton van Wegberg aaftraejend. Ze zeen allebei herkeesbaar. Waal haet oze vöörzitter vöörig jaor al aangegeave gein verlènging van 't vöörzittersjap te wense. 't Bestuur haet aafgeloupe jaor poginge óngenómme óm 'ne nuje vöörzitter te vènje, mer det is nog neet gelóktj. Dus hiebie 'n dringendje oproop: Es g'r affiniteit höbt mit Veldeke Ech en g'r wiltj eur lidmaatsjap oetbreije mit dees functie, numtj 'ns vrieblievendj contact op mit ein van de bestuursleje, den kènne w'r óm de taofel gaon zitte óm dit te bespraeke en wie geer dao tegenaan kiekjt!

Waal is 't ós gelóktj óm 'n nuuj kandidaat--bestuurslid te vènje! Gaer zulle w'r deze aan uch vöörstèlle en tót beneuming äövergaon. Moch g'r zelf bestuurslid wille waere, of wiltj g'r emes, den kènnt g'r det bekèndj make bie de secretaris t/m 15 februari 2020. Dao kieke w'r nao oet!

In de pauze gaon w'r verder mit de foto-prissentatie van Geert Janssen. 't Nuje jaorprogramma weurtj hienao toegelichtj. (achterkantj van dit V.B.) Wie w'r ouch verder gaon bezig haoje, zulle w'r ouch dit jaor neet verklappe!

Pej of allebei. Detzelfdje es g'r same mit emes es introducee wiltj gaon. De toegangskarte krig g'r de betreffendje aovendj bie d'n ingank. In beide zale is gein plaatsreservatie. Väär 'n gooj zitplaats zótj g'r dus op tied dao mótte zeen. Ouch óm ós van de kaertjes aaf te helpe.

Haopelik zeen w'r ós:

Woonsdig 22 jan 2020 vээр 19.00 oer in de hal van Royal oppe Pejjerstraat. Zaal aope vanaf 18.15 oer.

en/of

Zóndig 26 jan. 2020 vээр aanvang 13.33 oer bie de entree van de Pejjerhaof aan Houtstraat 7.

Resultaat Clubsupport

Wie al eerder gemeldj in oze Nuutsbreef (mer neet ederein óntvungtj dae via email) haet oze kringkas weer 'ne goje impuls gekrege ! Doordet zoa vөөl minse, leje en neet leje - mer waal lid van de Rabobank - op Veldeke Krink Ech hөbbe gestömtj, is 537,38 euro biegesjreve op oos raekening. Dank aan al diegenen, die hie aan hөbbe biegedrage.

Zöstervereniginge

Heemkundevereniging

"Echter Landj":

* Daensdig 14 jan., 20.00 oer

Laezing "Selfkant"

door Jan Bovendeerd

Buurthoes St.Joris, Cypresstraat

* Daensdig 10 mieert, 20.00 oer

Jaorvergadering,

mit korte filmf W.O. 2

Buurthoes St.Joris, Cypresstraat

Verder info: www.echterlandj.nl

Natuur Historische Vereniging

"Pepijnsland":

* Daensdig 21 jan., 20.00 oer

Laezing door Ad Havermans:

"Klimaatverandering en de Nederlandse Biodiversiteit"

C.C. Pius X, Mussenstraat Echt

* Zaoterdig 25 jan., 09.30 oer

Wielewaalwanjeling

"Wentjer in de Daort"

vertrék vanaaf observatiepost "de Wielewaal"

vөөraaf aanmelje

Verder info: www.pepijnsland.nl

Vereniging v.Natuurvrienden

Zöstere:

* Dónderdig 16 jan., 19.30 oer:

Film "'t Bleumke d'r oet"

in de Hermeniezaal, Feurthstraat, Zöstere

Info: www.natuurvriendensusteren.nl

Alle aovendje zeen toegankelijk. Es g'r neet lid zeentj taege 'ne kleine entree, net wie weer det doon bie neet-leje.

ADVOCATENKANTOOR | **Reijans**

Maak gerös 'n afspraak.
T leeste gesprek is altijd vrieblevendj en kosteloos!

Mr. E.H.C.K. Reijans
Advocaat

Milieustraat 3a
6101 CW ECHT

T 0475 40 15 22
I www.reijans.nl

Blaemeshop
Bovend'eerd

Keyerstraat 6
6101 CL Echt
Tel: (+31) 475 486407
email: bloemeshop@xs4all.nl

Limburgs grootste keurs
in tuinplanten en bomen

Limburgse Landbouwvereniging
H. Maessen

Rijksweg Zuid 23 Echt
0475-481293
www.limburgplant.nl

Herdenk leven

Peusen
afzetting - consument

www.peusen.nl
Belleweg 87, 5081
Koudekerke 15, Bussum
0475 464 500

NEWAVE
ENGINEERING

NEWAVE
ENGINEERING

MULDERS
ADVOCATEN

VERTROUWD IN OPLOSSINGEN

Postbus 1, 6100 AA Echt
T +31 (0)475 - 419 419
F +31 (0)475 - 486 474

Houtstraat 56, Echt
Akerstraat 157, Kerkrade
www.mulders-advocaten.nl

Paula Cox
Mooi Wonen

De verkoop van je woning,
van start tot eind geregeld.

Betrokken, creatief
en betrouwbaar makelen
met kennis van uw regio.

+31 (0)6-547 970 47
www.pcwv.nl

P
reuterie

P TOREN

7 dagen per week geopend

Houtstraat 15
6105 - 43 23 95
www.prorerie.nl

Rabobank

't Bestuur van Veldeke Krink Ech wensj alle leje, mitwèrkendje, sponsors, zöstervereniginge en anger relaties

'ne ZALIGE KERSMIS
en 'n GOOD 2020



Indien onbestelbaar: Oleanderstraat 2 6101 BX Echt



Krink Ech

JAORPROGRAMMA 2020

De activiteite van de ieëste maondje staon besjreve in dit nummer.

- 17-01 **Flitscursus Spelling**, in de Pejjerhaof, Houtstraat 7.
- 21-01 **Laezing äöver Klimaatverandering en biodiversiteit.**
Samewèrkingsactiviteit van de Natuurhist. Vereniging "Pepijnsland".
Gemeinsjapshoes Pius X, Mussenstraat. Aanvang 20.00 oer.
- Januari: **Dialek in al zien sjoanheid:**
- 22-01 **Op bezeuk bie de Bóntje Aovendj vanne Aester** in Royal, Ech.
- 26-01 **Op bezeuk bie de Aester Sjaelen Uul** in de Pejjerhaof, Pej.
- 21-02 **Daag van de Modertaal.**
Vastelaoves spraekoer: "Good Plat" in de kefee van 't Cultuurhoes.
- 04-03 **Aangeklèdje Jaorvergadering**
Mit kóffie, vlaai, fotopresentatie en meziek
Pejjerhaof, Houtstraat 7, Pej-Ech.
- 15-03 **2e Echter Dictee**
Op zóndigmiddig van 13.30 - 16.30 oer.
Zaal Cultuurhoes, Plats, Ech.
- 29-03 **13e Finale Declamatiewedstried vâör de jeug van Zöstere e.o.**
Hermeniezaal, op zóndigmörge óm 10.00 oer
- 03-04 **19e Finale Declamatiewedstried vâör de jeug van Ech e.o.**
Pejjerhaof, vriedigaovendj óm 19.00 oer.
- 15-04 **Literaire Aovendj:**
Mit gedichte van Toos Schoenmakers en Riky Simons
en meziek van Willeke Simons
Pejjerhaof, óm 20.00 oer
- 28-04 **Laezing "Duvelsprie"**
Samewèrkingsactiviteit van de Heemkundekring "Echter Landj"
Buurthoes St.Joris, Cypresstraat, óm 19.30 oer.
- mei **Väördrachtemiddig.** Verder gegaeves volge nog.
- 10-06 **Thema-aovendj äöver de Selfkantj**
75 jaor nao aafloop van d'n oorlog
Pejjerhaof, op woonsdig óm 20.00 oer
- 10-07 **Jaorliks oetstepke.**
Dit jaor nao Zuid-Limburg: Eijsden en Margraten..
- 27-08 **"Zomer-aovendj in"**
Mit korte wanjeling, meziek en väördrachte.
- 05-09 **Dialek-mès bie de kepel op Sjaelberg.**
Bie gelaegenheid van de Maria-oktaaf
- 19-09 **Film "'t Galgenven"**
Limburgstalige filmaovendj in de Service Bioscoop, Pejjerstraat
- 28-10 **Vriewilligers aovendj**
In Pejjerhaof mit meziek, 'n hepke en 'n drenkske vâör leje-vriewilligers.
- 18-11 **Laezing mit beeldje äöver "Bak-hoezer"**
Door Els Diederens oet Valkeberg mit meziek van Jos Meessen
Pejjerhaof, op woonsdig óm 20.00 oer.
- 13-12 **"Op waeg nao Kersmis"**
'ne Middig mit meziek, väördrachte en get te aete - in de Pejjerhaof.
- 18-12 **Dialekmès**
óm 19.00 oer in de Kèrk van Pej en daonao kóffie in de Pejjerhaof.

Kringbestuur

Väörzitter:

Dhr. A. (Ton) van Wegberg
Oleanderstraat 2
6101 BX Echt
0475 48 21 49

Secretaris:

Mw. M. (Magna) Bedaf-Willems
Zwaluwstraat 4
6111 AV St.Joost
06 10 86 17 10
info@veldekekrinkech.nl

Penningmeester:

Dhr. Th. (Theo) Bougie
Thaalpad 129
6102 EH Pey
0475 41 11 69
IBAN: NL 65 RABO 0138 6319 64

Bestuursleje:

Dhr. P. (Piet) Aben
Schilbergerstraat 4
6102 AJ Pey
0475 48 21 46

Mw.A.(Anke) Heythuysen-Corstjens
Houtstraat 80
6102 BK Pey
06 30308494

Dhr. R.(Rinus) Mulders
Rozenlaan 22
B-3930 Achel (B)
0032 489 00 83 03

Mw. Y. (Yvonne) Smeets
Wilhelminaplein 4a
6097 AT Heel
0475 57 20 06

Foto's deze kieër van Geert Janssen,
Ed Creemers en Hans Simons.
't Lidnummer stuijt baove eure naam.